


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-114	An-Naas	6	1	Makkiyyah	Ke-21	3





### **Zaman Diturunkan**

Surah an-Naas juga diturunkan pada peringkat kedua kehidupan Rasulullah di Mekah di antara tahun ke-4 hingga ke-5 Kenabian. Ketika itu keburukan, kejahatan dan gangguan pihak penentang dan musuh Islam sudah mulai dirasa oleh Rasulullah dan para sahabat yang baru memeluk Islam.

### **Perkaitan Surah An-Naas Dengan Surah Sebelum Dan Selepasnya**

1. Di dalam Surah al-Falaq telah disebutkan tentang tauhid rububiyyah, di dalam Surah an-Naas yang merupakan surah terakhir al-Qur'an, selain disebutkan tauhid rububiyyah, disebutkan juga tentang tauhid uluhiyyah dan tauhid mulukiyyah yang juga disebut sebagai tauhid haakimiyyah. Dengan adanya perlindungan tuhan yang mempunyai sifat-sifat tauhid itu, manusia dapat memelihara dirinya daripada gangguan dan kejahatan manusia dan juga jin.
2. Surah permulaan al-Qur'an iaitu Surah al-Fatihah juga dimulakan dengan tauhid rububiyyah. Tangga pertama mengenali Allah dengan sempurna ialah adanya kesedaran tentang rububiyyah Allah.

### **Beberapa Kata Kunci Dan Tema Utama Surah**

1. رَبِّ seperti disebutkan sebelum ini bererti Tuhan yang menjaga, melindungi, mengawal, mengurus, mentadbir, mengatasi sekalian yang lain, tuan, pemilik alam semesta dan yang dapat memberi perlindungan sepenuhnya.
2. مَلِكْ bererti raja, penguasa yang mempunyai kuasa mutlaq, kuasa yang paling besar dan tinggi yang dapat memberi perlindungan.
3. إِلَه, perkataan إِلَه mengandungi 7 erti: (1) Tuhan Yang melindungi (2) Yang mengampunkan (3) Yang memenuhi hajat sekalian makhluk (4) Yang penuh dengan rahsia (5) Yang semua berusaha mencari dan merindunya (6) Yang Maha Berkuasa dan Maha Tinggi serta dapat memberi perlindungan (7) Yang layak disembah dan ditaati dengan sungguh-sungguh.
4. وَسْوَسه bererti bisikan halus, suatu pergerakan yang tidak dapat dirasai dan dikesan.
5. خَنَاس yang menyerang berkali-kali secara senyap-senyap dan secara sembunyi.